

文282.565
45



自序

昔人有覆瓿集覆瓿者何言其無用也無用而復集之
猶以為可傳也予材萬萬不逮古人不足傳并不欲傳
竊悔從前之刻瓿已覆而腐矣况年踰花甲與頹力備
偶有所觸伊吾之餘輒棄其草童穉輩私記而錄焉請
續梓於研堂藁予曰無庸也瓿覆而腐研不且磨而穿
乎雖然終不離研研則不忍去藁可更名因無卷帙名
曰散吟而加以花外花者何韶華也亦世界也萬事如
花予已外之矣傳云乎哉定安居士題



附題素堂攜曾杖國圖

龔秋崖時愷

人生七十稱古稀年衰未免筋力微人生七十亦常
事身逸心安都可致先生今年已七十精神矍鑠看
山立衰頽自笑說同庚偉貌豐頤吾不及尋花踏破
蒼苔痕每攜少子兼文孫子又生孫長等案牽衣欲
拉過前村仰視高松幾百尺靜聽濤聲生肘腋舉頭
遠近山四圍翠竹梅花嵌巖石羨爾攜曾今杖國縱
是扶筇不借力轉眼他年即杖朝森森芝玉還盈側

附記圖為金沙楊祖周鎬寫
照同邑范祉安子筠川補景

已未七月 祀蘇清讌即席呈素堂先生

道士 王道成

研堂深處有人仙爽氣橫秋北斗懸鶴髮宛如蓮社
老鳳毛不讓竹林賢詩經百鍊東坡咏夢叶三生佛
印緣且喜石麟來碧漢笑看頭角已昂然

已未十月 又祀蘇即事二首

釋庶菴

坡公佛印有前緣

用素堂先生
金山紀遊句

合享團圞湯餅筵笑抱孫

曾祈默佑願教仙佛錫長年

迦陵曲調管絃開主客交歡罄一杯燭影搖紅霜月
白平平擊鼓送神回

附錄

康熙己丑歲予以當事之命司賑新塘鄉駐雪堰地瀕
震澤湖甫至館公事勞瘁未暇遊訪忽有吳生長寅者
懷刺來晤投我五古一章匆匆別去後絕不通音問予
歸而詩弄篋中迄今二十一載行且忘之偶因曬書檢
得誦之清潤婉折翰墨如新竊怪其人與予猶桓伊之
與徽之與何相見之疎也會拉客賦秋花虛一席急走
舁往訊其家人云奄逝已十七載矣存僅三十六嗚呼
有志好學天不假年惜哉與予有傾蓋之緣而無過從

之雅低徊三復不禁慨然昔人云人之相知貴相知心
詎以生死間乎命孫書謨追錄其詩附予散吟後以訂
他生云爾雍正己酉閏七夕後十日定安居士書

吳楚榮長寅贈詩

兔園習固陋咕嗶慕吟詠門戶無從窺安能獲佳境
叶蒼茫讀古詩怵惕神難定雅好青門編耽癖同性
命因悉研堂翁悚然心起敬無由傍門牆詩篇想蒼
勁今春過吾鄉飢黎受孳孕彈壓息羣囂實心副華
聘賤子患曲僂謁拜苦蹭蹬寵賜十卷詩不下簾旅

賸

青門先生有
簾旅賸三稿

明珠真暗投負疴起留心

叶

挑燈忙夜讀

細細按幽徑膏油已漸窮呻吟四壁靜微聞聲戒眠
婦言且弗聽反覆翫佳句方知免餽飮蘇李較高低
杜韓相與競意到筆墨隨辭達神采凝掩卷愧茫然
心粗身亦病須臾鳴曉角陡焉發深醒展讀方再過
才高果無竝慰我飢渴懷拭我曾襟淨辦香當屈膝
匪阿亦匪佞提攜倘不棄德擬高厚勝學武豈邯鄲
應當笑癡興瓊瑤無以報何堪瓦礫贈

用研堂集中過青

門話舊原韻

劉生躍滄者名龍昇子仲姊之孫也於予為重甥生負
雋才恂恂雅飭能自刻勵學與年進甫及壯受知於學
使者殿撰東昌鄧公子見其試卷渾灑流轉醇而後肆
親黨間予每以大器許之甥亦以予為知己也癸丑秋
為幼子諸孫擇師而難其人適聞甥欲離家肄業急致
以盟書而甥又示我以今學憲少宗伯桐城葯齋張公
拔置前茅之卷原評稱其法密機圓杼袖由我而比以
豐年玉凶年穀予既服學憲之能得士而深幸子孫之
得師且竊自慰以為自此可以朝夕相賞析也孰意其

攻苦太過客秋又以試事冒寒病肺漸成瘵疾春正六
日屬其家人來告恨不能踐約而薦所知以自代二月
初予往唁之猶慰以平日文氣之舒長歲運偶然之晦
滯而不至於不起也奈何別二十四日而竟不得再見
嗚呼痛哉年三十六尚未有嗣昔人以長吉之夭為赴
玉樓之名亨於文者往往嗇於命天不假年嗚呼痛哉
其家人云疾革時惓惓於予且執其父手書予姓偏旁
以示意蓋沒齒不忘也噫予與甥有相知之誼而無朝
夕之緣此生無再面之期而姑俟他生之後會吾子若

孫無函丈之追隨而疑有空中之指授一靈不昧嗚呼
痛哉故作哀辭以遺其父俾粘於靈右以傳其宗族朋
友之知生者其辭曰

德門有美兮親串超倫温其如玉兮力學能文實賓
既至兮賞識惟真士難知己兮詎謂感恩慚予老眊
兮猶辱細論求師折輩兮飭我後人磨礪晨夕兮相
須甚殷事驚意外兮天敘麒麟彌留繾綣兮不忘約
信叶是真知心兮無間死生叶時逢寒食兮弱息衰

親

甥止一女其
二人已六旬

淚紛飄絮兮沾予鬢銀

甲寅重三日作

花外散吟

陽湖定安先生口占

男時保

同記錄

孫書謨
詩南

丙午三日立春隨筆六首

不用扶筇踏陌塵
盆梅小景就檐巡
依然古巷更新邑
重見生年又一春

庭前雙鴈喜和鳴
微雪消寒漸泮冰
忽聽報晴聲一噪

忙催廟見肅晨興

季兒
初婚

昨夜雲溪說子來
太平歌唱愜人懷
何事橋名攬朱雀

赫蹏饒舌滿坊街

謂陽湖建署事

驀過宮牆起敬將攜孫挈子似鷓行升堂祝圍紛陳列
指點葩經仔細詳

頻年閉戶與時違拉客春盤省陋規只有一椿聊復爾

任他兒女祝齊眉

家人擬以穀日如予上年例祀壽星并西王母為山妻壽

湫隘敝廬甘草草菟裘營老笑皇皇杜陵有句今同願
飽飯終年相見長

穀日紀事

南極長筵昨例循瑤池合享一番新六旬偕老非奇事

四世齊眉第五人

自曾王父以下至羣從兄弟凡三十餘人結髮同週花甲者僅得五焉

盆梅

何年分自橐駝手栽入花瓷破萼新綴石一拳千尺勢
繞闌幾曲萬家春齠同庾嶺香逾密夢比羅浮味更親
誰道寬閒寂寞好得人欣賞便增神

安孫晬日誌喜

江梅半放日初晴老抱孩孫倍有情衣製加長圖易長

印鋟小字望揚名

予為製一章刻安親揚名四字本孝經

一經教孝吾猶健萬事

惟康爾自明他日干雲能直上願襄文思到功成

花朝前連日苦雨一韻率成四首

九十春光將半過那堪花信幾蹉跎明朝又道花生日
抵死封姨妬淚多

行人每苦沾衣濕老眼尤憐著屐多空問杏花何處有
鄧山詩客尚磨跎

枝頭好鳥集朋歌一霎離羣悵若何應是散花天上女
塵緣未了也滂沱

癡心兒女祝花多擬把紅羅繫百柯不道撐犁煞風景

且須移作

去

帚孃拖

帚卜拖裙見石湖
詩即俗云掃晴孃

久滯城居自謔

不向東田五月餘尚平已老尚牽裾園丁屢備加餐飯
社客頻移穩坐車空負新花遲彼岸翻教閒鳥愛吾廬
平生漫抱柴桑志竊恐多男更不如

大士誕舉放生會於白雲精舍卽事

陽春萬物沐天和善果同心起刹那神呪千聲解網闊
楊枝一灑轉輪多飛潛盡識西來意去住長看東逝波
昨夜圓通疑入夢慈雲覆遍白雲河

上巳看梅二首

時在別墅三
月朔日也

誰道梅開占蚤春莫春天氣半含曠不圖曲水流觴客
猶作山橋驢背人

幾枝嫩柳間疎勻壓慢天桃作殿春離騷忘却渾閒事

寒食寒香話柄新

越二日即為
一百五夜

清明

追和山谷韻
禁犯其意

清初自昔稱佳節山谷高吟踞上頭雨過踏青抒野興
風多插柳遣春愁斷鳶處處喧聲遠祀竈家家餽食稠
且喜朝來晴日好麥秋在眼卜秋收

池上

風光新霽好池上抵蓬瀛鳥弄花如語魚依藻有情攜
樽遲月至坐石看雲生隔岸垂楊裏時聞扣榜聲

春鳥

雙雙春鳥嗅殘梅飛啄悠然去復來留與幽人長作伴
此中風月儘無猜

遲心潔購樹不至

何事髡奴去不回豈逢棒喝重徘徊十年癡計君須悟
到處春風總是栽

立夏日見牡丹有感

穀雨花開立夏期總然富貴也非時却令千載貪癡老
藉口非熊會遇遲

賦得燕子日長宜讀書

三餘努力未須誇獨愛如年趨日華展卷抑揚縈思靜
窺牕下上和音譁優游待月嫌神倦老大焚膏歎眼花
王謝遺巢宛如在莫令飛散入人家

蒲菴道人六十有詩紀年次原韻賦贈

湧蓮令節正清和鳥語花香問答多杖撥羣迷心浴日
座翻千偈口懸河伊蒲饌設留山客梅樹林開掃塔婆

佛臘無期忘甲子不煩人世歎蹉跎

漫興

有約河之干

謂舉放生

冉冉又三月竭來還閉門匡牀獨抱膝

柳絮飄無蹤醑釀殘似雪唯有石巖花冷處一腔血

偶題

老蠅慣逐腥那知筵易散遺滓錦薦花一朝觸清眇玉
塵試一揮羣蠅都戰戰有翼不能飛有頸不足斷投溷
亦奚辭餘臭何年澣

叶

競渡

薰風吹動鼓聲揚
兒女喧騰索綵裳
堪笑人人誇競渡
可知靜處是慈航

午日南邱省墓

丙舍松篁翠色勻
臨河又見鼓旗新

龍舟好事
即在比鄰

生存寂處

上今喧熱

先庶王母原以午日
生半世長齋習靜

翻惱陰陽會惑人

感事

經過海婦祠遺像已露處
右楹蓋像新端坐誰家女
玉石且未分公私混一字
祠下水滔滔涇流雜渭渚
不見東里施捧心徒自苦

雲車行

鄉儻俗尚隨方變
蘭陵獨逞雲車悍
鐵架雙孩抵百鈞
健兒一肩抖擻旋去
金鼓喧闐擁載塗
歷扮傳奇儼畫圖
創設緣因問遺老
僉云髣髴助陣隋
司徒隋司徒忠義
動人千古事於今
翻作兒童戲

遣懷

乘興遊行頗有聞
歸來坐向一爐熏
呼名知免懷蘇轍
作字終投慨子雲
閒看庭花隨意放
靜闕林鳥辟去人
欣千秋多少紅塵客
恍惚浮雲散夕曛

賦得好雨知時節

一陰初復候百穀正新苗按曆驅屏翳司天息赤燿南方帝曰

赤燿怒紛如銀竹散注似玉膏饒何必義和巧勞勞卜算遙

卽事二首

行吟苦地濕兀坐亦何妨茗煮黃梅水衣熏蒼朮香

乍嘗時裏白魚名喜索狀頭紅酒名嬌兒弄銀蟹遙憶海昌

風海昌出小蟹名沙裏狗可下酒昔年有餉予者適幼兒所弄却似之

攤飯

攤飯愁脾病北牕支嬾架默默復垂頭羲皇風豈怕

靈芝篇

澹香池畔天竹本上產芝五莖昔夢嶽詩南讀書於此喜而賦之

靈芝生幽谷樵者習為常咫尺几席間罕見堪矜張黃

黑辨喜惡紫赤洵稱祥昔入坡仙夢味擬雞蘇香吾廬

澹香池有竹挺其旁托根土氣和產異寧虛慶叶音羌一芝

莖五出金玉相輝煌實貺勝幻境撫掌呼如狂怡我斗

老孫悅我添丁郎或者為我壽食之真人長丁寧巴童

知慎毋輕毀傷

東坡夢石芝詩在元豐三年五月十二予今以五

月廿八作此榴花未盡落化日同舒長越日又記

六月十九日買舟放生由雲溪抵德安橋過龍

興禪院登眺

大士今朝道已成吾曹猶未悟無生白雲渡口弘慈事
紫竹林中自在情一帶波光新漲滿萬家烟火古燈明
從今了得圓通義任爾逍遙度太平

採蓮曲

做青蓮體

望月橋邊花欲語望月橋在金陵舊院處近橋多種千葉蓮別來幾換秋風旅紅
裙妝香尚流連白紵歌殘漫延佇儂家小隱碧天池無
那頑童暗折枝露氣初收日將下還憐纖手慢牽絲

秋蘭詠

百草敷春榮蘭胡稟秋氣驕暑未云徂靡靡具腓卉都
梁標國香挺然箭拔萃觀者達幾先遂以金行識去譬
之士夫羣特表君子意

其二

蘭為王者香雜以蕙芷偽微嗅氣餘濁徒冒靈均佩昔
傳玉鮓奇閩山冥搜最此種亦閩來清馨庶幾類凡物
鑒其真毋俾混蕭艾

其三

秋花叢桂尤香促飄信宿何如此幽姿韻遠兼旬馥玉
莖散參差碧蕊絲芬郁靜對須良朋狎賞薄流俗祇可
啜芥泉那堪饜酒肉

竹廊下

香山有美景難忘竹廊下句子
家以此三字習呼堂後之軒

竹廊名已久當景最難忘有籟皆成韻無風亦自涼品
茶宜掃石醒酒欲移牀且喜門無客坡裙任老狂

曬書

并引

予曾作曬書有感詩在康熙甲申七夕屈指二十
餘年所蓄書卷多屬塵封閒亦涉獵今老而目昏

且不能卒讀因繹前詩之旨大概為人感也茲行
自感矣蠹魚其笑我乎仍疊前韻作此丙午七月

朔日

書巢未許老蠹成義馭當空耀赤瑛自笑腹便類虛筍
還憐手澤重連城渴澆惟把賢聖酒淡嚼何須父子鯖
髮白更看文術嬾

用靖節
責子語

不知他日又何情

自題杖鄉圖用了元禪師自贊李龍眠所寫照
末句作起

太平時代自由身妙句無雙寫得真鐵柱杖疑蘇二贈

石麒麟倩李公神

亦贊中語

鄉行遵古非為僭野服違時不細

論漫道手中忘拂子十年前已坐椽茵

予五十時已寫執拂逃禪一照

自題東溪垂釣圖三首

東野溪邊一老夫閒來聊試有魚無入山樵子莫相喚
狼虎中間免著吾

自古耕莘釣渭侔若論畎畝尚多求何如穩坐茅根上
得失隨鈎願者收

脫略衣冠狀古愚臨風微笑頗煦煦路傍不識無名氏
疑是蓬壺醉倒徒

紫薇花盛開有懷醉吟舊游因誦香山先生絕

句疊次其韻三首

壽白堂前花爛熳果然紅放半年長吟肩白首三人簇

謂予與蒲菴梧坪

若箇評花堪對郎

栽培總為先生愛薇省誰傳後世長自分絲綸本無分

止堪池上老漁郎

琵琶千載餘音歇楊柳當年別恨長

二語并寓感丁亥舊事

此地儻邀

驄馬過花魂還認校書郎

璋兒生母六十用東坡朝雲詩韻

蒲柳居然鬱晚天也堪伴我共清玄
幹兒雖長未聞道
泗上無師自會禪
勞比敬姜還服職
春羞樊子却深緣
幸無酒炙煩渠老
儘可逍遙望月仙

時八月三日

中秋後一夜霽月

久雨方止是夜正望

不見清光踰十日
今宵皓魄乍鮮新
誰賡對影成三句
共話團頭少一人

顯兒在省

瑤兔憑空增氣色
玉蟾當滿自精神
寄言老此吳剛者
信手攀來莫認真

鼬鼠

鼬鼠人言會旺家
誰知暗裏中去
疵瑕嘴尖似鼠能穿

穴尾大如狐亦射沙
慣竊埒雞施伎巧
常搬倉糗托神邪
何當掣電追風手
遺臭連聲竄跡遐

大水歎三首

并引

自七月杪至九月初
淫雨不絕積漲盈丈
汨岸平橋禾正秀為之大傷
時省試歸者言三場俱遭傾
瀉號舍水浸尺不勝酸楚
予忍作局外觀耶倣少陵
秋雨歎體賦此

黃梅賦雨喜知節
誰料白露苦雨多
浹旬匝月滴不止
高原平坂都成河
良苗欣欣正含秀
一望蒼茫不可究

田丁數告嗟如何洩潦無方手徒袖
槐黃舉子策蹇忙長干道上波汪洋一肩油幕淋漓重
二條官燭浸淫煬窮年誦讀縱矻矻可似耕耘費盡力
昊天降割困農人何惜書生不稼穡
頻年恆暘膏澤曠去歲小稔穀直賤人心戲渝俗轉靡
天意示警歲復變江南賦重民力枯十室九空懸罄如
減浮緩逋已浩蕩敢期遇歉還蠲租

遂初堂遺文刻成感而有作

六十年前勇退居留貽簡牘已蟲餘追懷閩海歸思樂

鳥有此名敢學南豐字注魚荒徑久疎長者轍清風不棄舊人
廬祗應醜酒長松下把翫高吟問太虛

補和陶二首

已酉歲九月九日

今歲實丙午借和如晚藁
中庚戌西田丙辰下溟例

是歲節何遲霜降十月交

九月廿九
始屆霜降

重九無黃華井梧青未

凋東坡昔改作

見和陶
此詩引

我祗趁秋高鷗鷺浴清渚鷓鴣摩

層霄三徑幸無荒稚子能服勞觀彼石上局援我囊中
焦題糕亦草草薄醉足陶陶催租人不到單句賡明朝

止酒

平生非嗜酒欲止不得止機發談笑間病中去腸胃裏
痔患如懸疣血流若產子一夕歡有餘十日苦不喜久
臥殊困神客來又強起若復任豪情幾至無生理沉吟
重絕人終悔徒損已如何得計決不見便已矣行當屏
酒具投畀水之涖大禹有深惡願以告千祀

人生世間當止者不獨一酒客其笑予言之過激
耶請自思之宜有利劍在丙午重九後一日韓友

齋隨筆

已上計五十九首

丁未元旦

後生首祚氣如虹老景朝慵強起同几杖敷陳需侍史
衣裳顛倒待熏籠心情尚擬遨遊客顧盼寧希矍鑠翁

用馬援六
十二事

檢得當年學語句

前丁未除夕先大父有
最喜飴孫能學語之句

却疑過甲又

還童

詩南生朝喜而示之

端郎

詩南
小字

我家孫夙慧信天賦生初抱異居昨歲來就傅

過目輒背誦一字不遺誤氣度如成人英英頭角露戲
言老夫遜跨竈渠父怖傳硯許若兄更將何物付他年

賦滕王下筆自神助切莫僅雕蟲經緯到宇宙叶

題浦陽阡舍

昔日營南邱那知近西蠡名流浦陽長鑿溯鷗夷子西

河一名浦陽溪相傳范蠡所鑿見郡志想欲泛五湖煙波達千里我豈斯人徒

巢林亦樂水大智知幾神行藏無定止深愧局鄉井却

顧老病死種柏繚石垣編籬傍水浹餘年寄一枝終焉

歸藏去此追遠不渝言窀穸相依倚自古重結髮同穴

循配禮風驅白虎精雲鬱青龍社敢云庇無窮聊以畢

吾事叶

題幽風圖十章并引

前歲予六十製一小屏圖幽風十幅忽忽二載未

措一語題識今春復展布堂上瞻翫之餘殊覺古

風之有味而詩思其來也援筆為此豈曰炫文采

於揮毫亦以示典型於諷誦云爾

春酒介眉

古人頤養醇醪先駐顏尤宜驅餘寒幾樹梅花屋角綻

十分春色杯中妍賓朋滿座杖者主樂酒無荒相告語

不見門前于耜人匆匆已望橋東去

同饁畷喜

東作方興待餉急老者率先婦子協轉綠舒青萬頃同
鋤雨犁雲千耦集忽聞畛上有車麟僕夫况瘁大夫勤
指點殷殷莞爾笑莫負君公勸相思

筐女繫桑

豔陽天氣飼蠶忙執筐女子攜同行無小無大孰爭競
桔之禰之何短長枝頭好鳥娛春色和鳴兩兩雙飛翼
詩人善體女心悲不是思春楊柳陌

采茶食農

菜根滋味由來長膏粱在前猶暫嘗孟夏已秀漸可采
何待脆美經秋霜有嗆巧嬾愁無米得此一物聊相抵
田家茹苦本常情飢來况更甘如薺

烹葵食瓜

今人葵菜尋常味古人特取供賓祭今人銷暑嚼晶瓜
古人充腹啖貫家均食新秋應時物用心豐儉胡不一
偶然閒話對兩翁流火熒熒警望中

載績剝棗

閨中辟纊隨登織每聽蟲語心忡忡取材已預蓄萑葦

落實豈徒嬉兒童一供公子裳衣用一給賓筵邊豆豐
却遺本計在圖外其獲早早迎金風

築場納稼

秋冬之交田家樂三時辛苦一時釋叶登登聲應擊壤
歌粒粒迴思日出作男功女助收藏齊古今農事原無
奇土風嗇謹摹入細箕斂遺滯童驅雞

茅絢乘屋

受宅五畝半在邑綢繆未雨秋冬切茅茨一體想堯階
繩縷縱橫勝陶穴此功何必謀公輸自經自營還自居

改歲尚寬正農隙胡為并日如鞭策

纘武獻斲

漆沮習尚攻田獵況是嚴寒藉重革狐狸又備公子需
縱斲分別鄉農臆區區野獸何足奇忠誠奉上洵難得
誰知邠人一點心即肇騶虞旅獒業叶

躋堂稱壽

松柏夾道山崢嶸羔羊朋酒人羣登有人率謹想田峻
捧觥從者惟兢兢画師大雅非流俗件件追摹神理足
獨疑一事誣幽公雲端隱見琉璃宮

十一月下旬第五孫和郎痘症告吉書此示渠

父兼遣悶懷三首

半邨半郭足成家另居南河如達生來智慧花於今只要無災

難何用公卿又望賒

纔說清和氣稟嘉四月甫生一陽來復發天葩俗以出痘為開天花老翁半

載多愁悶兒報平安獨可誇今歲小兒此症少吉

天時人事有循環雪霽風和靜掩關已得五孫堪繞膝

新春綵服喜嫵爛

登玉樹樓遠眺有感戊申正月二十一日

年來足輒強登樓極目雲烟天際流千樹梅花迷別墅

萬家春雨罨南邱虛摹耕饁幽風景漫指川原禹貢籌

時有濬河之役把酒掀髯聊自遣那堪兒女又生憂適薛壻至談及兩家近事

花朝喜晴往省南邱種樹因步春雨堂眎和孫
有作

載陽風景逐城東却過南邱愛鬱蔥襟帶江湖常不斷

曾玄血氣自相通鶴來華表千年樹雛托雲山一畝宮

且喜和孫初學語依依知戀白頭翁

偕館師攜幼子童孫觀文廟禮樂

禮行樂奏幾千年少長羣觀豈偶然象勺及期應探索
情文到老要鑽研親師便解朝儀習承祭還將傳訓先
莫謂叔孫綿最遠儒宗一脈尚相延

題梅蹊曳杖圖

行來香國知何地遊入星宮不見天莫笑此公扶杖早
已方和靖有餘年

寒食雨

非關出火與焚山舊俗支離盡可刪只為春深風雨候
遂傳佳話滿人寰

有小鳥不知名巢樂志軒竹枝每至旦輒睨睨
弄音可聽枕上口占二絕

鷓鴣也擇一枝安却向幽篁話歲寒頗似晨鐘發深省
莫將鳥語等閒看

不是子規啼夜半偏教公冶辨初昕世間蕉夢知多少
早醒誰能及此君

金絲桃

以下四種
齋中所有

三月名花五月開色絲縷縷異紅腮一叢爛熳實何處
空教曼倩步虛來

剪春羅

有美機邊欲贈媒
標梅已賦未經裁
薰風感就花紋碎
細細開箱驗幾回

玉簪

無瑕插髻自稱佳
作底參差蔓草偕
賺得纖腰俯首拾
又牽絲棘墮金釵

龍爪

小草偏教負大名
秋風鱗甲恣威靈
枯守石邊渾不動
幾時飛躍到滄溟

詩將

此以下九題和靖集中贈張繪秘教者
本五律今變其體為絕句詩如其數

文事何將專闢誇
騷壇推轂等宣麻
六花八陣隨題擺
一掃千軍信手拏

詩家

骨瘦恐嫌終窶相
腹便平且莫逞豪華
捨尋李杜都無
謂容易成名自一家

詩匠

子雲壯志薄雕蟲
何事騷人比百工
得心應手公輸巧
斧鑿無痕造化同

詩狂

杜甫當年認老狂那知李白更飛揚脫鞵捧硯清平調
此際何曾怕玉皇

詩魔

聞說禪家易著魔詩人索句却如何推敲兩字傳千古
行吟魔較坐禪多

詩筆

詩成不得揮毫手猶如背癢待麻姑伸紙疾書渾不擇
右軍刀楯未全無

詩筒

竹本心虛貯句宜同心唱和此君齊風雨不侵山水便
雅勝擔囊囑小溪

詩牌

水松乞就蘭縑贈李白事一片高懸瞻翫餘緗錦千函徒什
襲爭如珠玉照幽居

詩壁

襟懷勃發紙梢窮淡墨淋漓粉壁中野店山橋多草草
幾人能有碧紗籠

戊申九日偕友呂梧坪攜壻薛申子麗照夢嶽
孫書謨禮莊登君山作

豪風千古仰山頭幾輩登臨悵苦留席帽同懷經卅載

追念乙亥四郡同人舊事

天香獨唱又今秋

壬寅秋過澄江有天香初放玉蟾新之句

老觀壁上

猶心喜

兩孫初應院試

興到江干莫賦愁回首夕陽西下處鴈聲

嘹唳度蘆洲

有感某氏

題望江樓

用扇頭摩詰青溪詩韻

磊磊春中山森森大江水登山復登樓極目幾千里樹
叢杳靄間城隱碧空裏列幟颺輕風巨艦飛一葦鎗盾

亦已嫻赴桓羣萃此

時值江靖水師會操

自笑行次且

二字並平聲

無能且

耄矣

謁二侯祠

明吳襄烈襄毅兄弟

開代雙驍將延陵二玉昆分茅同澤國

一江陰侯一靖海侯

立祀並

龍門

祠宇逼近試院俱侯宅故址

氣槩虹霓壓精靈日月吞後來茲土守

克配幾人存

合詠杜康橋劉伶巷

杜康善釀家何定劉伶荷鍤任情行若非江水邀知味
此地胡來兩美名

贈鄂城卜寅菴

楚熊策國本英雄學易來吳驗易東黃鶴樓傳仙棗吏
紫霄宮駐鹿門翁一簾香散人同善四海情傾道自豐
十二年來風雨夢且將斗酒瀉胸中

麗照學射人頗可之賦此以勗

誰言藝事不須求試射髫年觀德優審固從心平似準
挽強應手熟如油力兼巧中千人掃勇必謀成四國道
敢把武夫輕李郭功名不讓范韓儔

夢嶽生朝置酒小集

十二月二日

問年當數

上日

借臘笑開筵最喜藏鈎戲居然老將先

戊申除夕二首

此夕歲徂夕六十又經三踰年符易卦守歲共詩南

孫名

予憐其失恃撫之同寢

松枝知更老蔗境可餘甜却喜看新曆書年依舊添

己酉正月二十日同呂梧坪釋蒲菴祀香山先生於壽白軒以坡公配并招九十四齡道士王中谷飲福仍依醉吟首會例用履道七言六韻

體紀事

晴日開梅淑氣天春風遍地草堂先行年恰及易卦數

養性何如詩首篇漫比香山還欠十香山尚齒會時年七十四慚非髯

老已無前長者俱已辭世予忝主爵酒踰三爵猶判平醉饌取重烹不

怕堅如滿法身方矍鑠小回謂梧坪道履正踟躕况來堯佐

稱人瑞此會應堪抵九賢

時執事從拜者為兒子燦重耀即麗照夢嶽女壻

薛申孫書謨禮莊詩南外孫薛元朗凡九人壽白

軒主人并記

閏七夕開樂志軒列盆花數十種招諸君飲先

成二絕遂各繼聲又拈秋花各二題即席分賦

長句得老少年美人蕉

頻年却掃卧秋雲花徑重開鵲駕辰惆悵雙星合離條

分題舊事溯庚寅前度閏七夕予與陳呂諸君雅集賦詩屈指二十載矣老成凋謝情境變遷不勝感慨係之

五色繽紛列幾叢竹林揮塵引清風何須更製同心膾

無限情懷一醖中

無苞無萼占花前幻出丹黃巧奪天豈是葛翁仙藥煉

還疑萊子綵衣翩凌霜暮景童顏好裊露晞光妣色妍

不羨靈椿八千歲儘驕蒲柳有餘年

一種蕉花意太憨芳名心醉眼尤貪虞姬血灑殷紅吐
西子眉顰晚翠含傲彼繭絲堪作葛嬴他萱草自空男
冶容諦視難描畫半與題詩半睡酣

分題後一日又作紫薇牽牛花二絕句

天上星垣臺省名移來卉木也歡心不是白郎題句好
那能艷羨到如今

不見天孫詣爾曹假名白丑亦徒勞鍾鍾底子由他喚
一入騷壇價便高

已上計五十三首

以下附詩聯句
俱不入數

附 閏七夕截句并分題

書謨

漫勞鵲羽更填河成就雙星好事多又把機絲停一
夜七襄未報却如何
秋花疊見一番新滿座嘉賓句有神讀罷奉觴頻勸
酒棗梨應助老人津

凌霄

托根雲徑蔓高騫應與松筠有宿緣攀得龍鱗能直
上參他鳳尾欲超前微香飄拂因風便瘦影嶙峋得
露先遙看星羅復霞綴恍疑身在散花天

花外散吟
向日

青蛾紅粉洗春妝
高艷浮空拂苑牆
金質千層堪衛足
檀心一片只傾陽
敢將靈氣承東壁
還共幽姿映北堂
俯仰有時多宛轉
舒華摠為答秋光

又

詩南

鍼樓又見金梭落
綵盒重邀蟾子來
堪笑今年頻乞

巧未能銷得舊癡

韻見廣

許嘗醇酒何知味
莫惹飛紅點素衣

去歲失恃

玉樹移栽萱

草謝飴庭繞膝復依依

秋海棠

晚英旖旎傍莓牆
豈讓高枝艷仲陽
幾陣涼颼醒宿酒
一番疎雨洗新妝
為嫌膩粉輕勻粉
莫恨無香細嗅香
清絕何曾春睡足
滿庭烟月斷愁腸

洋繡毬

奇葩堪與貢珍侔
簇朶團圞五色收
紅日滾來滄海畔
錦雲堆上碧枝頭
烟花隊裏誰曾識
蹴鞠場中豈漫投
不共牡丹爭向暖
還同叢菊耐霜秋

附

後九日家大人續得名花數種拉客補賦奉命

學作二首

大人齋詩各效雙鶴詩及夢嶽

曼好不百日紅

霜姿爭說鴈來紅百日長榮更不同
殷色弗隨朝雨退彩英寧逐暮雲空
三分歲序枝猶艷強半秋光朶正豐
誰道交情衰一樣司花耐久獨加功

長春花

分陰常惜可能留小草茸花却自由
豈僅松筠同不老直教天地竟無秋
淒風翠葉忘時換皓日瑤華駐景悠
堦下餘香誰管領捧將堂上佐觥籌

中秋前三日同人集遂初堂賞桂聯句

雙桂依然好

比年

如金粟滿叢何勞剛斧斫

素堂

非假臬人

攻萬斛香遙散

位成

千鍾味不窮含苞舒湛露

克勤

簇朶耀

初瞳黃蝶尋幽夢

夢庭

銀蟾下別宮小山枝偃蹇

素堂

靈隱

子璫瓏郗氏林非一

石人

竇家株竟同蕭森環堵影

于昭

鬱

郁繞筵風霏霧侵衣冷

尚乘

攢星照醖融人間賡調絕

逸仙

士介寄芳雄繪畫窮神技

祖洲

雕鏤擅化工古香收錦句

清品入耶筒蔽日今逾舊

夢庭

飄階色是空若論凝翠

晚四友歲寒中

素堂

硯堂賞菊聯句二十韻

秋淡爽氣來逸興擬元亮東郭選黃華西堂開宿釀素堂

凌霜骨愈堅聚飲情彌暢不却金叵羅如看錦步障石人

層層映座鮮簇簇當窗漾鶴頂仰松喬鳳毛期遜抗夢庭

晚香壓羣芳奇色魁對狀冒雨笑孤尋題糕喜共向祖洲

高燒鐙燭煌低衛瓊瑜壯雜坐挹清芬淡談領佳况于昭

契茲邱隱心陋彼肉食相插鬢思古狂餐英敦素尚逸仙

持螯故例循說餅新盤創同拜醉鄉侯特推詩壘將克勤

評花見經綸漉酒忘得喪晨夕儘盤桓主賓都跌宕位成

樂天任吾真寓物愛非妄絕世嗤許由沽名薄种放尚乘

南山几案間一榻羲皇上珍重素心言怡然就省曠素堂

是歲秋花會詠亦云富矣就中從其居止咫尺晨

夕過從者復作兩番聯句唱和之樂孰以加茲予

杜門有年辱親朋不棄嚶鳴來集故爾拈韻起結

非敢叨執耳之名聊以遣離索之况云爾己酉重

九日記

十二月十七日立庚戌春示兒孫二首

文字詩歌付汝曹從今玄悟自陶陶都忘好句書新帖

只見梅花醉白醪

林泉肥遯尋常事花鳥同春活潑心騰此兩言當去衣
鉢又教穉子拾遺吟

庚戌花朝適得鐵梗海棠即種花國戲成一絕
花朝有酒酌花知恰得傭丁餉一枝何事媽紅名鐵梗
此花恐不合時宜

芍藥花

端爲花王屈作相看來國色也無雙問誰堪媿卿爲壻
縱有潘安貌亦降

勗壻邵鵬孫

爾祖昔推著作手今爾剛當文賦年自有鞭霆真一脉
相期擊水尚三千杏花酒債休多戀梅雨離情莫更牽
時壻去
家負笈漫道雕蟲雖小技也須努力細鑽研

蘭瑞歌 并引

庚戌三月二十九日次孫禮莊畢姻盆中草蘭特
發一枝高五寸許花開壯茁經旬不萎尋結蘭實
親朋稱瑞老懷不覺頓暢作此以紀

春莫藥欄看殿春祝融司令行浹旬百卉爛熳已零落

蘭草何意枝重新花房湛足秀而實風雨保護如有神
家人驚異推何因仲孫娶婦諧姻親滿堂歡笑盡鼓掌
孫又生孫此兆真僉謂上天鑒我老來歲孔釋送麒麟
酌酒俛首謝踰分薄德敢望生超羣先世積善多男慣
庸材樗櫟徒紛紛但願生兒健如虎氣可食牛堪負薪

題蔣弱六前輩菰米山房詩鈔兼訓令孫羹樹

當年御李未投桃饑眼於今得飽饗四海雞林爭紙貴

千秋騷席列名高移居椒涖欣同志

蔣居鶴宕
予卜洋區

締好蘿松

愛後髦

羹樹女字
子孫詩南

珍重遺編嘉惠意日吟幾首教兒曹

立辛亥春即事紀年二首

臘月二
十九日

何事街頭人織如携筇緩步立堦除久無門籍書新客
惟有春風護舊廬

待者稀年只欠四望而傳歲可餘三披裘抱甕都無著
儘教人笑老癡憨

當事檄催謁選請以老辭

用先大父集中謝
客彈冠第一首韻

年來豈但髮蒼蒼敢學馮唐言更唐晚步每呼兒作杖
朝餐先進藥多方神疲恐失三叅禮思室難成一報章
藉手原情賢守令莫教匍匐向都堂

夢嶽為生母乞詩書扇仍用東坡朝雲詩韻前為

暉兒生母
已用此韻

堪笑楊枝去樂天憐他早識命中玄十年敝服同衰嫗

二子清規似老禪兼為麗照慈
母訓如已出食性細諳疑夙慧館蟲見東坡
藥誦

勤拭信深緣人生那得朝雲兩愧比坡公也號仙

水仙花

梅芳蘭秀自無前却有幽花獨號仙心似黃金非點鐵
瓣如藍玉不生田芙蓉未侶先超俗蒼筤推兄亦近禪
誰道湘君隔千里香風咫尺翠衣翩

補種牡丹行并引

予比年留意別墅花國牡丹轉失培養如曩持所
賦青蓮萼各種均已銷歇近得紫天香一本補栽
中砌略還舊觀撫今追昔感而賦之

萬物盛衰各有候奇者坎壤庸者壽况以富貴屬柔條
難保堅牢長挺秀花國花王舊勝期同人浪比金帶圍
就中蓮萼品最上鞞紅玉版羣鬪題那知慶賞不可狃
十年零落尊酒疎借問阿誰職其咎主人舍舊新是圖
竭來頗識大還丹歸休何必營他山仍向閒齋問生意

天香異品填青蓮此品詎是紅塵物疑摘雲根分月窟
殿烟袍色胡足倫紫姑仙韻差堪繫登坐中臺示獨尊
行當婢眎玉樓春遮幕燒鐙循故例飛觴相對加精神
吁嗟乎花枝苑枯猶遍嬪人生波逝難重見當年分種
上賦詩人幾箇滄桑如夢幻

繡毬

青青碎蕊白成團偏附花王作女官拋向石邊誰忍蹴
却教沉醉幾翻看

蒼蔔

雪封瓊倚咏如林誰解花心似我心敢倩髯蘇移一句
世緣終淺道根深

閩窰準提像向在玉樹樓香火積久近因洗滌
見座下陶註大父諱恭奉字知為佛現燈花後
所造今特移供抱膝亭上敬感交集爰紀一章

七十年前見一人

筮江上先生為大父題見一亭

攜歸瓦佛澤如新園林有

警行荒草

感近園近事

丈室無憂坐繡茵法相玄空多隻眼工

夫次第悟三身清齋幼子忻同願

夢嶽性不喜葷今隨子持十齋

豈是前生

未了因

辛亥夏日葺玉樹樓

步大父重葺
遂初堂韻

玉樹留題先澤在，綢繆已後敢辭勞。花培西院添新滿，竹擁南牕比舊高。駒隙漫驚愁裏過，禪心不礙醉中逃。唏噓今昔剛週甲，他日兒孫莫逞豪。

前辛亥大父析箸以樓屬予
予今葺為長孫書謨娶婦處

預擬書謨合卷詩

憐汝勝衣弱，今方嘉禮成。相莊看案舉，交傲賦雞鳴。襍

硯承前志，占熊衍後生。吾年雖已老，猶及聽歡聲。

栖雲山房去歲時，荷未放今暑連發。數枝枝必

向佛如有感召者，因題二絕。

當年鉗竹翠重生

丙申春事
有偈別載

此日盆蓮又效靈，佛坐蓮花非

有愛蓮何愛佛，獻娉婷。

淤泥不染亭亭植，欲語嬌名到處馨。爭奈人間無可語，

願隨微笑共惺惺。

中秋玉樹樓翫月兼以落成

恰值良宵喜落成，清光萬里自同晴。雲斑人靜華方現，

露泥上更深，影愈明。穉子囊螢茲暫輟，植

徐人作
長呼

孫學畫

也關情

書謨解
作小景

偷安家食團圓話，悵望關山隔遠程。

懷親家
沈釜樂

雲昭父子一在
江右一在北恒

八月三十日曾孫馨兒生二首

正發天香得寧

去

馨果然蘭瑞不虛呈

前有歌紀事

目前有喜

同蕭傲却無賒望作

去

公卿

一家歡笑共相看盡道他年振羽翰惟願邊陲征戍罷

何妨辛苦只儒冠

韋齋先生生文公有洗兒句云有子添丁助征戍肯令辛苦更冠儒今為下一轉語

三日與親朋小飲兼賞庭桂又賦

湯餅未斟桑落酒弄璋先酌桂脂漿一陽猶賸行當復
况過七日即重陽

秋杪過東郊訪菊并紀事有作

去年買菊當重九今歲看花近小春豈為霜遲需氣候
却教露重越精神抗懷元亮吟由舊寓意希夷劇匪新

予年少時見有演希夷劇者茲以曾孫彌月狗家人請祀嶽廟覓演者不得

酷愛古人吾獨抱紛紛傀儡

任今人

辛亥誕辰

已開七帙幾多年蒼徑依然九柏全安步不須邀賜杖
加餐何必肆歌筵素無熱客來門外喜有曾孫在目前
彈指陽生春又到梅花書屋且盤旋

壬子上巳欲訪蒲菴庶公及象林上人值雨不

果因與幼子諸孫就澹香池上擬曲水流觴故
事以寫悶懷酒酣率成二絕

平生方外喜過從劇雨如絲阻屐蹤却愛吾廬撫曲水
聊將觴詠滌塵胸

封謁相誇愧寧馨學書也解祖黃庭梅花屋額雖遺蹟

從今應署小蘭亭

詩南時年十二命書
小蘭亭三字可鐫額

題姑蘇呂仙祠

紫霞峰畔得金丹黃鶴樓頭肉眼看遊戲隨緣皆作筏
雲山何處不棲鸞障空煩惱殘碁散夢覺榮華曉漏寒

幾度低回題柱句一聲長嘯海天寬

壬子夏五過梁溪舟泊惠山寶善橋散步諸舊

遊地不勝感慨係之援筆賦此

靈山名泉萬古長勝遊興替亦何常二泉碑銘新換舊
聽松株朽殊蒼涼大殿樛枝杳不見不二門滅惟巖牆
遍訪遺老已略盡林園割裂途茫茫可憐寄暢驟零落
園丁自主沽茶湯引泉斷續聲嗚咽險橋勉度心驚惶
凋殘松桂付薪火山靈減色溪無光吁嗟乎俛仰十年
彈指頃一別會難分行藏借問伊人向何處長安揚策

馳康莊誰為寄一言胡不歸故鄉人生無事斯為福名
湯利火徒皇皇舉目橋名發深省楚書寶善非荒唐

登錫山重謁于忠肅公祠

和壁
間韻

昔年瞻拜拂清塵琳宇松寮構尚新社稷自垂千古業
干戈誰料一家親只茲示夢徵靈異豈博他朝致享裡
惟有青山同不朽白雲深處護忠臣

白雲深處門額也其主僧已
歿旁舍盡圯今屬鄰僧啓閉

惺惺泉

近縣治
小橋側

茲泉久湮沒新濬得名馨竇乳輪團甃龍淵讓汲併隱
之何用試陸子可曾經若非達士飲胡獨號惺惺

右軍故宅

即今崇
安寺

晉代衣冠舍今為法化城鶯羣翻貝葉粥鼓當鐘鳴修
築方經始笙歌已落成吳儂真好事雜劇動人情

壬子閏五日即事紀年

隙駒忽忽歎從前行樂逢場趁午天樽酒蒲榴重整頓
畫船簫鼓又喧闐隨人逐獵休稱老攜幼尋花倍覺妍
四度天中多一節

壬子生丙午歷乙卯甲戌癸巳
迄今壬子凡四閏端節矣

相看七十欠三

年

用香
山句

曾孫馨兒晬日遂初堂家讌賞桂

繡祿擎來解笑迎承歡兒嬾煮尊羹一堂四世非奇事

五服無雙足慰情

目下服族見曾孫者惟予一人

金粟滿庭知後祿日躔在

角卜長庚他時學語稱吾壽此日先期壽比彭

更名學彭字歷三

重九日薛婿邀同幼子諸孫過錫山登高看菊

有酌即席紀事

榴花初照往來頻又見黃華滿眼新扶幼何須還覓枵

前度曾索時尚短杖

酌泉焉用更思尊遊同赤壁慙重賦集比蘭亭

不待春借問此行誰為趣入乘龍年少已三旬

薛誕在是月十七日

已上計三十六首

起已酉十二月

有鑑八章

為邑令汪作也

有鑑高懸

平魘魅不前有衡持平

毗連切

盈縮無偏

棘薪如之何利斧乃折壽張如之何片言已決

鴟鴞鴟鴞橫

去

斂鵲巢鷹鷂一擊肉爛魂消

不茹不吐以理為經心冰面鐵狐鼠潛形

白日當空陰曠何從一雨輒散霽月光風

誰謂渭清猶受濁涇此有止水到底淵激

宵衣廢寢才長越境

叶下競上臺時檄審他郡事

豈不愛而身惟公是競

在昔先民恐人知清今也或亡立碑泐銘公曰吾分焉

用沽名

我生三章

自壽且自咎也
壬子誕日作

我生之初珂里縣

平 弧 時子父母居
鳴珂巷舊宅

祖命來抱含飴讀書頗

負蚤慧見稱鄉閭曷料無成老大頭顱

從王末由

叶延知
切音移

求友何為今已息機年迫古稀喜見孫

曾身入兒嬉人曰爾福吾羞食粟

開小香山髡奴問答

叶且
悅切

聊學逃禪實非佞佛斷緣銷煩

逢原乃覺

叶吉
列切

猶然雕蟲見道何日

附 王石人贈詩并跋

定安仙人五福臻齊眉接日賡歌頻綵衣葉葉都瑋

璘孫復生孫蘭香新維祺在德天篤因仰瞻道岸何

嶙岫歎猶自屈不自伸豈徒貌為鳩杖人

子月七日為定安先生皇覽之辰前一日即尊配

孫夫人設悅日也先生今年六十有七夫人少先

生一歲竝黑頭健飯兒孫繞膝昨歲更得曾孫足

稱英物古所云備五福者當不過是而先生猶欲

然以未見道自咎其所以深造而自得者又孰從

而量之其於是日偕諸君子舉觴敬賦小言奉贈

一笑誠不免雕蟲之習云爾苔水王家柱跋

壽徐氏季妹六十兼示甥霈蒼二首

憶昔垂髫日相依吾母前斌斌嫻鄭範朗朗誦班篇龍
壻真嘉耦麟兒正象賢何圖而立歲中道斷良緣

霜幃已卅載三世隻身肩鯉膳朝暉裏熊丸夜月邊桂
林一枝秀蘭藥滿庭鮮建楔今方盛終期達九天

立癸丑春用白句紀年作起率成短章

十二月十九日

六十八衰翁春遊興尚濃過江陟浮玉度淙叩仙蹤何

必從猶子直上五華峰

有姪遠任滇南

歲杪雜感

壬子

窮年却掃掩荆扉株守幽棲靜息機何意故交聯駕到

顧湯接日見過

更從新令看春歸

郡守加意迎春

門庭僅整今猶昔身世渾

忘是與非且喜吾孫思漸入敲詩會得老夫微

謂書謨

詠盆蓮

并引

盆中蒔蓮初不知為異種暑盡特發一枝有似錦
邊而紅白變現莫定其名作此以紀癸丑立秋日

春半栽荷夥似麻何圖夏盡發奇葩海棠著雨疑添粉
玉樹臨風想帶霞一捻何如妃子醉三翻未許道壇姮

况來野外連枝好點綴虛堂勝錦遮

四季蘭

列品芳蘭第四稱

本蘭譜

花勤冬夏總堪矜買得一年看幾

度何須玉鮎與金稜

感早桂

報道天香七月開佳人爭插鬢邊來却笑東籬高隱菊

秋深還伴圃翁頽

示麗照

祖烈文兼武爾僅具麤才請纓當有志自獻絕無媒

甲寅元日立春拜先像後留諸弟姪飲思詒堂

吾生四遇歲朝春

一歷乙丑丙子乙未迄今歲

燕寢居然第一樽敢笑香山

遲放妓不煩坡老戲頑尊

用惠州老舉人六十九生子乞詩事

潔清自愛追前

德豈弟平懷裕後昆且喜開年滿七十

香山句

捧觴添得幾

曾孫

題內子抱曾圖

昔日含飴喜弄孫抱曾今又掌中珍生來嗜飲偏同性

膝上分他一盞醇

自題攜曾杖國圖二首

安居何必更之秦
曳杖春遊足養真
愛殺了元高占句
太平時代自由身
孫又生孫又幾年
相攜偃傍未扶肩
聲聲叫我太公去
趁此和風麗日天

罌粟花二首 即麗春花

麗春花出殿春羣錦被 一名錦被花 平鋪一畝雲
五色日華疑

似爾九苞鳳彩却輸君

摘來盈握人爭取
瓶插成叢女欲分
嘉名變態詳花譜

惟闕歐陽寶器文 歐陽公有翡翠罌此花各色俱備獨少青翠一種

再祝荷花誕仍用昔年和友韻

名花佳誕競相傳
此日猶長似小年
勝覽西湖追羽士
上書南劔望崔圓
日暄香散還從衆
露冷房收獨解禪
深悵阿瑛聯句後
何人白戟啓紅蓮

弔老梅 在澹香池上

吾家舊有梅花屋
兩樹虬根枝屈曲
垂髻猶見花繽紛
及冠旋看株朽獨
尋來低亞好新枝
手自栽培剝還復
春雨秋風五十年
傍檐拂檻滋苔綠
初夏依然梅子纍
暑雨浸淫枯葉倏
人言花好勝人生
開謝年年相接續

誰道吾生七十齡已見花枝兩翻覆

賦得讀書秋樹根

水淺波平宿雨晴朝來爽氣動人情盤根似洗堪抒卷
疎蔭如吟想答聲比彼螢牕逾瑩去淨羸他雪案少淒
清歐陽夜坐猶多事何必悲秋以賦鳴

過蘆墅

楓樹蘆花曲水邊人言此地採菱鮮目前有感言難盡
風露淒涼已半年時二親
厝此

喜龔秋崖遠歸來晤適庶菴在舍話舊良久即

約重九日過草堂賞桂

不見秋崖廿七年重來正好話團圓三人恰似排行鴈

秋崖後予生十七
日庶菴少一歲

九日相期延壽盤莫把機心還入世惟憑

笑口儘追歡嚼香未及浮青蘂

用誠齋九日
菊未花詩語

猶倩天香訂

歲寒

九月十九日小香山禮大士

梅花亭畔小香山何日移來兜率天靜坐年如百四十
修行願及大三千香留桂子還遲菊露滴蕉心恍似蓮
髣髴白衣重示現綵雲深護石龕邊

乙卯正月二十日招同龔秋崖釋庶菴祀香山
先生於壽白軒以坡公配因誦秋崖上年賞桂
恰賸三人守歲寒句樂故交之重聚慨今昔之
難齊就飲福為醉吟結局即用前句中平聲各
闡一字賦七言六韻又分賦歲寒三友各一種
仍依興化池亭詩體

得三字

卅載吟壇振雅南自乙酉迄今已三十年矣先生髯老擬驂驪還憑煎餅

圖高會肯負如蘭怕劇談秋日重逢陽九九春光早約

徑三三只茲夙好能投漆何必誇多更盍簪看竹正宜

人卓犖秋崖賦竹拈花自合老瞿曇庶菴賦梅從今頤養休敲句半覓

遨遊半睡酣

賦松

松似蓋如龍枝影月頂生風石間相賞嶺上偏容時供
仙侶食不忝大夫封入畫持堪獻壽著書偕老潛蹤養
自何年春雨足歌傳天保九如終

時執事從拜者為兒子顥燦重耀麗照時保即夢孫

書謨禮莊詩南書誥樂咸樂英曾孫學彭并記

題周西園竹硯

性海傳竹爐在惠山留題美且都昔年叩山僧卷存爐已無

周君栽竹硯品題更華贍破方而為員自銘以自鑑由

來灑翰與烹茶千古騷人兩慣家安得此爐置硯北蘭

陵韻事成雙壁

時保為生母四十乞詩

容光消滅尚嫣然漫比金蟬伴老泉豈是樂城堪保母

謂撫麗照又生烏子慰衰年辛勤主許中閨助淡泊人稱少婦

賢畱取將來題小影也教一派子孫傳

賦得雲霞出海曙

五七言各一首

天開圖畫好春意望中求膚寸崇朝合高明萬里稠爛

然鱗作彩蔚若蜃為樓細錦層波現奇珍嚮曉浮遠人

驚入貢少婦思凝眸五色誰能賦應推第一流

矯首遐觀天象新凌晨萬里淨無垠波臣動處瑋璘起

旭日升時燦爛陳入夏竒峰輸好景當秋帶雨欠良辰

文章大地無踰此為報江南得早春

示時保詩南

因寫照補入杖國圖作此

問齒隔年纔一月時保庚子臘月生詩南辛丑正月生同行禮數每參差他時

若被君王戲可說臣家叔不癡

訓龔秋崖見贈七十原韻即以爲壽

潞國同生丙午年遼東歸鶴獨成仙盟心舅弟重携手

接武曾孫羨比肩

秋崖已得兩曾孫子止有一

踏遍九州仍不棄

其客遊及十餘省

期過百歲尚相牽等身著作休終祕還望王盧要合編

某月某日次曾孫生

爲書謨預擬

前歲仲孫先抱子今年喜見長生曾同堂好作去傳呼

戲白髮無庸鏡鑷憎玉樹樓輝繡祿麗石麟天送綵雲

蒸他時若得徵簪笏

用魏暮事

祖烈猶存六世承

自叅藩公至子曾孫凡六世

題龔秋崖梅蹊獨立圖

百花開放誰居先歲寒三友梅爭妍明月美人差彷彿

雪山高士相牽連吾友武陵挺奇特冰爲姿兮玉爲骨

灞橋庾嶺任遨娶踏遍天涯還獨立誰歟寫照得其真

朱衣襯白尤精神意中眼底無塵物微笑閒看世上人

彈鋏歸來訪舊遊柴門蘭若日周流雄談傾倒平生事

一日不見如三秋問君行年今幾十與我同庚開八帙

同生夏正一陽中身命分宮並磨蝎

秋崖以磨蝎爲命宮予以爲身宮僭擬韓蘇多得謗

譽果有定數耶迴思少壯幾何時瞥眼相憐顏色易偕行君步疾

如飛形瘦神強吾不及吟壇松竹狎齊盟
謂近日分賦事獨翫梅
花占早春但願優游忘歲月醉鄉同作無懷民

花朝後十日過別墅席地嗅梅題五六七言各
一截句

浩然遊興遲新霽風光促昨夜園丁來報道花開足

村酒三杯獨酌青檀一晌酣眠夢裏飽餐落蕊覺來意
思悠然

門外休教俗子詣此中自有真清味卜築於今十六年
纔安半席香林地

閏四月十日得書謨入泮名次賦此誌喜兼誌
感焉

文章知己頗難論鍼芥相投始見真父子宗工都具眼

祖孫叨拔第三人

康熙己卯予赴部決科時文端張公為大宗伯拔
予第三今嗣君學憲亦拔書謨第三洵異數也

放

歸眊矐徒懷德賜藥羸殘得保身

書謨患瘰癧覆試時蒙
垂問諄切賜方療治

老朽

無成甘已矣願教小子報深仁

附
次韻

龔秋崖時愷

得失雖然未可論文章面目本來真燈從佛祖傳時
密研到文孫授有人

青巖公傳研兄
今兄又傳開夏

王氏一龍堪快意謝

庭列樹足娛身况當四月清和候梅子生仁杏又仁
送書謨入闈後攜時保詩南遊雨花臺作

攜幼登臨興未休雨花臺上覓遨頭幾人學步忻初到

廿載辭場笑自由

謂自

桂蕊含香白露湛秋叢鬪艷碧雲

流嘗茶小憩喬林下指點江湖望莫愁

用壬午同家弟登金山韻

在省遍訪舊交如雲間王范之寶應相燮三白

下陳效豐王畹玉輩俱已物故并無後人應科

惟得晤虞山馬莘叟之孫文平

名家駿

劇話昔年情

事悲喜交集為作是詩

不到金陵越十霜物移人換已滄桑有孫寸進奚堪道

老友交情未忍忘惆悵凋零誰聚宿

秀

繹思豪俠尚餘

香古今一夢何時醒却在青年要顯揚

金陵歸棹仍由大江過金山風駛未及登泊岸

走北固山一眺

孫子扶持任並肩老夫遊戲混童頑年華七十力雖怯

錦繡江山緣豈慳玉帶風流懷舊蹟米家書法訪他山

一帆飽送知神助萬頃安瀾去復還

用甲午送顥燦兩兒省試韻

雨中桂

色香兩美此花兼易謝那堪雨更綿翻遜海棠猶耐雨
紅顏呈媚受人憐

詠懷

我居定安鄉頗得定安意學道由此入聖經明指示定
後取次安中有一靜字胡為妄動人此心役物累得失
苦交戰形神並憔悴譬如走馬燈中熏外騁轡漏盡蠟
成灰須臾乾沒淚君子鑒於斯養心以良貴仁義即膏
梁文繡當身備賒願悉蠲除有命莫倖致四時呈美景
大地文章在無入不自得妙訣只素位

乙卯紀年起用白句

皤然七十翁猶有童子性偷閒覓遨頭搜奇若奔競壯
志薄膏腴老懷希蔗境叶兒孫侍晨昏出門便呼應先

巢望翠微

寺名在安陽山

陳墓

山名

相輝映却過芳茂山轉入梅巖

徑頗似行脚僧雲遊諸刹勝不願登綺筵准擬坐禪定

丙辰新正家讌

預擬紀年

吾今已年七十一

白句

古稀幸過開八帙况有山妻竝白

頭人說因緣天巧結同生夏正一陽初少予一歲長

上

一日鹿門偕隱未為奇馬齒平頭俗相謁去冬謝客入

深山新春難卻諸舅姪鄉風元日即稱觥祖居梁溪有此例椒酒

壽筵兩并一雜陳野藪及山肴不辦歌喉與舞倫家傳

儉德足延年淡泊信是長生訣四世齊眉第五人一堂

四代服族缺二句註並見前老興猶堪永夜歡頽然一醉陽烏出

預擬後歲為詩南娶嬾於梅花書屋起用白句

足成一律誌喜

七十人難到過三更較稀况有孫鍾愛自幼撫之膝下喜見子于

歸梅藥先春綻燈花徹曉肥小鬟來進果老眼數入拳

幃已上計五十三首起壬子十月

乾隆元年予已開八山妻亦七帙平頭家人以

正月十一十二兩日為予兩人生命之辰仍如

週甲舊例合祀壽星王母於樂志軒弟姪輩來

見者即會食焉倣唐體賦六韻紀事

君恩真浩蕩重老及臣家夫婦生朝接翁孫四代誇為

乘燈節好恰借日辰嘉南極來蒼駕西池降綵霞苾芬

澆玉盃踰濟看蘭芽應誦無荒句休休樂自賒

附次韻

龔秋崖時愷

陽春原有脚先到子雲家僊宴堪為例良辰更足誇

令妻成母壽賢主式賓嘉燈影舒紅燄尊光泛紫霞
梅開從老榦芝長綻新芽佇見朱輪滿誰云望眼賒

花朝自醒三首

悠悠七十一年春看過風花不記巡自少惟知書裏事
如今不是夢中人

玉蘭點雨難完壁鐵梗遭風亦近魔寶樹無花省蕙墜
蒼翁慣妒奈如何

誰道蜂王信有神花間來去不踰旬

俗以其來
去卜興替

由來天運

循環轉物性無常何足論

擬唐人清明賜新火代

天子乘陽氣隆恩渥近臣季春傳改燧佳節重溫綸寒
食方開禁鶯花正好辰桃夭舒色艷榆火出煙新上殿
頒金椀中官降紫宸擎來光閃閃散去燄鱗鱗蓮燭忻
歸院書燈喜給隣調餬消粥冷煮茗和香勻祀竈需然
蠟祠墻便爇薪僮童偷白打遊女惹紅塵受寵思酬主
邀榮得展親大庖分一炬寰宇萬家春

挽吳門沈釜樂親家

憶昔相逢京邸日酒豪步健正歡時通門孔李原排鴈

締好雷陳又結禱陋巷客過分手速三年前曾以餉京過舍一宿而別抱關吏

隱去官遲卒於南豐任所勸君不早伊誰咎痛哭殷遙一首詩

憶燦兒時滯吳門

父子關寸心咫尺如千里玩物頗勞神奕棋尤得已

立夏日為義壽洗三作麗照長子丙辰三月廿三日生

舉孫三日夏初逢萬象朱明氣宇豐文經武緯須兼備

莫只粗才似若翁麗照以武藝名故云

賀重耀生母兼喜得次曾孫五月三日生小字沾恩

為去兒至老尚辛勤與嫡均沾粟帛恩近奉恩詔七十以上給布及米更有

一椿天賜喜蘭湯又浴一曾孫

丙辰中秋末子諸孫試畢喜飲桃渡寓齋即景

越日仍偕遊金陵諸勝二首

家讌年年樂事稠良宵客舍亦優游綠絲夾岸垂朱檻

皓影當空走碧流少子推梨情繾綣諸孫分餅意綢繆

迴思吾父提攜日週甲於今欠五秋予自康熙辛酉始從先君入省闈屈指五十六年矣

壁上觀光興轉賒期年兩度看山花雲流接水仍無際

鴈字排風又不差登眺須乘朝氣爽盤桓未覺夕陽斜

懸知結網毋疎意麟鳳雖分却一家是歲特科增廣解額上下江分卷而瑣院仍合

恭謁 夫子真像

像用漆胎製就不加采繪巾衫跌坐傳自山左摹來曩在慧照菴率子孫往叩不得徧詢

土人後及一僧始知十年前為省中庠友移供學宮尊經閣下遂趨謁焉

昔年瞻拜祇園地此日尊崇在泮宮
竭蹶遍求方得見 聖人原不棄愚蒙

歸過金山率子時保孫書謨禮莊詩南同遊

金風暖似杏花天玉帶橋邊秋色妍
昨歲未遊今得補

蘇公佛印有前緣

得見兩公銅製遺像於慈雲閣

中秋後六日抵家即趨定安草堂攝靜

歸來信宿指東村金粟星星點菊根
會得羲經安土義

從今不再僕兒孫

重九前後連日看桂訪菊應接不暇

桂芳菊秀接重陽到處遊行引興長
遙揣翻遭俗子笑 閒人排日為何忙

題柏芝圖

并書後

瑤池開宴西王母帶索行歌榮啓期
同遇太平 天子 世邀恩歡樂無窮時

乾隆元年重九後十日為吳門沈師母九十大壽
因呈此圖并擬六如居士壽王文恪意題一截句

以博諸君子之一笑云

玉峰有感

丙辰長至日攜五兒登眺因步至如來菴問葉履承柴問宏輩物故已久慨然作此

崑山出良玉自昔比人傳欲耀人間寶須鑽璞裏堅玲
瓏猶在望秀傑已飄然訪舊棲禪處傷懷廿載前

冬晴述懷

小春長至總晴暄盡道天時復一元行旅不須愁水涉
耕夫趁早好犁翻惟思樂志無他羨勉學從心未敢援
朗誦淵明恬適句朝朝擁褐曝前軒

丁巳正月十二日送大姪方達北上

五上公車又遇恩

姪以甲辰鄉薦原屬特科至丙辰凡五會試今丁巳又逢特科故云

懸知釋褐此

番新一杯相餞逢佳日太平興國二年春

是日呂蒙正等御前釋褐

提月之夜點燈酌酒與徐甥霈蒼遣懷

時甥有彭城之行

吾甥酒膽繼前豪

尊人克大向稱善飲

風雨蕭蕭豐沛迨滿酌玻璃

銷別恨且延三日閏元宵

行期在二月三日

挽吳門沈師母二首

去臘登堂笑語清方期百歲再稱觥那知天名從仙會
王正二日即遄行

懷雲亭畔白雲傳芝玉森森滿院馨夫子騎箕先卅載

於今上慰在天靈

春社

春來強半靄漫天纔罷燈宵又社筵燕影差池如拱揖
鳶聲斷續入歌絃齋郎處處婆娑舞神樹村村榆莢錢
獨悵梅花濛雨過草堂寂寞望誰憐

新種牡丹盛開

嫣紅姪紫西施白老眼流看頓醒昏富貴不求來不却

花神有讖示兒孫

時值義壽晬日而沾恩亦在近

喜乳燕效沈石田送歸燕體

見弘治元年所題畫

喜乳燕喜乳燕學語喃喃學飛漸青春病月甫胚胎入
夏溫風已翮健惜老燕惜老燕終日營巢綿力辦衰翎
帶雨歇牆頭敝尾穿林覓花片乳燕成老燕倦追思舊
燕賸巢空約略十年今復見補缺依然東下檐添門宛
爾西開院雙飛化作一羣飛對語翻為多語亂飲食本
似鴉鳩均反哺誰如烏鳥戀只恐雛多巢不容秋來散
去難重面

戲題僧院

風動幡飛本自然如何饒舌兩三番為除煩惱遊禪窟

又惹狐禪更覺煩

心潔疾篤送歸剃度僧舍預與一訣

心潔年十三來予家為侍史三

十七送僧房剃度別字雪融仍依予小香山奉佛香燈今年五十有八九月廿二日子作此慟之後七日示寂

半僧半俗學修行憐汝從吾有宿因四十五年緣已盡

檢書問答更何人

閏重陽

漫將寒食比重陽

東坡云人生惟寒食與重九為不可負耳

秋月終逾春月光

翻用坡公夫人語

况有黃花綿晚節更斟桑落繼前觴題糕又見添佳話
吹帽何妨再戲場百歲歷中纔一遇歲朝春少尚尋常

諺云百年難遇歲朝春近五十年中已四見矣

重耀與生母及其子孫分居北關之左

分居咫尺近相望不離開屏借城千仞門迎水一灣庭

蘭宜善植圃菜莫全刪奉母安閒去須知養志艱

丁巳十一月廿七日時保合登賦此勗之

久結向平願而今始得誇安和能順意靜默自宜家

壬子

歲因媳父母俱亡已撫在予家此二語其實錄也

相愛琴三尺勤規書五車欲成渠樂

志時保幼有出塵之想猶待十年賒

為馮明府作

公名國祺號祚園浙江山陰人

無端橫逆來賴公明且決代庖竟仔肩

本陽邑移關事

闔戶

方銜結詎料量移速借寇心徒切去思一爐香位配三

公設

予家佛龕右設報德去思位三公謂前郡守景州
枚臣李公邑令侯官澹齋謝公會稽方中汪公也

新浴詩

嬾如煨芋老僧般忍垢窮秋近歲寒

不浴已七十餘日矣

敢效成湯

還銘器原非貢禹欲彈冠

新沐者必彈冠本荀子

去汗豈作三春媚殺

癢全圖四體安聊賦短章自嘲謔披裘不整任人看

瑞雪

諺以臘雪為瑞

假寐銷長夜窺窗訝乍明細看知雪滿預卜歲豐盈

雪不止

門外罕人過林中宿鳥多擁爐仍不暖澆酒復如何

心潔存日奉佛之外予以盆樹委之修剪灌溉

甚勤今臘月八日見盆梅無蕊且枯者過半睹

物傷情復作此追悼二首

盆樹全憑爾力植不道人亡物亦非剪枯理穢呼誰應

招魂何處望來依

釋氏舉火後予收其骨瘞於浦陽阡舍
隙地又附其主於小香山佛龕右下層

梅雪爭春先破凍今年春早凍猶膠

臘月望前立春

梅想有知隨

骨冷雪消春近尚無苞

戊午元旦次文衡山韻

并引

偶閱先生詩集見有此題越一章即己未元旦起
句云勞生九十漫隨緣知先生當戊午歲蓋八十
有九矣予心慕其壽而未逮也妄擬作此蒼蒼能
假我年否耶

天放晴光鳥弄音餘寒冠下尚遮巾愛看妻子青氈舊

喜見孫曾綵服新

孫曾共得十人

謁祖燭傳霜角曉迎神香捧錦

堂春

家有宣銅盤鑄御製錦堂春詞

已賒半月如酥雨草滿城臯好作茵

懷古篇

并引

予少時於市上得一銅章有張伯雨三字彼時不知
名人舊物為銀印僮父所惑遂磨去改作自己名印
長乃知張伯雨者元季高士句曲外史也倪雲林先
生極欽重焉吁人以物傳物因人重至今思之不忘
悔之無及矣雖然其質尚存古趣可玩每摩挲不忍
釋手抑嘗聞昔人有前後身之說予不佞身雖未入
山而性情已如出世豈伯雨後身耶聞竊自疑且自
愧因成此篇并書顛末以紀云

人生務立品無問貴與賤勝國有逸民風流實堪羨聽

雨樓序賢張雨壓倪瓚雨也字伯雨產自武陵貫學道

句曲峰外史名傳遍當時交稱重文靖虞集與文獻黃法

書片紙寶直抵千金玩詩派尚清高迴邁元氏翰今垂

四百年載籍留黃絹竭來一印章流落市郵傳余少未

諳事雖得墮俗見磨篆填我名鏤刻從人換沉思每懊

悔却把古人慢古人不可作微物繫愛戀文亡質幸存

光彩照几案及今不表暴竊恐漸滅漸漫附前後身自

疑遠自辨提出示兒孫珍重莫輕看

喜雨二首

七月初十日

自春入夏雨愆期旱魃為災暑更奇車屏七旬今暫歇

天心方轉莫相咨

安民自昔懷君惠憂國誰歟肯費辭幸遇 聖明無忌

諱何妨賀雨一題詩

喜見外孫邵曾達二首

八月三日

汝母于歸經十載今方得汝望承曾青門先生頻詢小字

傳何晚一見知從伯達稱共曾祖也

屈指生辰剛七月生於上元後一日之無早識白家風他年手筆

追燕許豈特鬚髯似兩翁青門故髯子亦相似

喜時保禮莊詩南歸自白下兼慰書謨

謨以痰癘注足不與

省試至是

方得漸愈

老去馳驅壯志灰由他躍冶不須陪

此番予不往送

長干道阻遲

音信玉樹樓

書謨所居

高屢折迴忽喜歸來金粟綻羣忻病起

菊花開一家聚首聊安樂好辦持螯酌舊醅

同吳門沈紀恒及兒孫輩郊外看桂訪菊

有客偕遊碧水隈兒孫扶我任徘徊依然叢桂兼叢菊

三載韶光若矢催

憶丙辰前度

登慈度菴後閣謁梓潼關聖像

文武星精萬古傳吾孫書額僭高懸

乙卯歲書謨奉體天翊運一匾

此來攜

幼重稽首不為求名却信天

步隔塵菴有感

近郭茅菴已遠塵來游杖履適天真零星桂蕊猶堪折

感慨當年分詠人

憶丙戌三月舉醉吟會各詠居止古蹟呂鐵州分得此題人已云亡廿四年而居止亦滄桑矣

送沈紀恒赴平原董氏

憶昔萍蹤我似君南園知己感慇懃寄言四十年前客

已卯曾主黠菴公處

高臥深山看白雲

選菊集飲二首

次首因得異種名滿腥紅作

鞠華應節選尤佳密朶疎枝要巧排毬子燈前疑玉盞

蜂鈴月底恍金釵沈思謂紀恒北去增行色徐孺謂孺蒼甥南歸解

渴懷况有兒孫能酌斗何妨永夕樂無涯

爭看異種出洋東腥血層層溢滿叢襲舊猶存太師白

翻新不數狀元紅羗擅好襯輝燈下麻葉紅菊名難陪耀日

中坐對移時謀一味攜來黃甲和青菘

詠盆中枸杞

買到吾家四十年幾番剝復老根延今冬火齊去枝頭

滿點綴生朝共樂天

又

仙杖輕身自古傳一盞居然勢蜿蜒或問臣生幾甲子

恰逢師曠不疑年

已上計五十一首起丙辰正月

己未花朝遇春分節賦此并紀事

春光剛半恰花朝百卉森森吐蕾饒曉曉報晴遊伴集

輟輶送暖袷衣飄霞開佳日栽梨旺星見良宵看杏嬌

且喜新婚將匝月已逢冰泮又桃夭丙辰有詩預擬詩南娶婦至是歲新正方畢姻事

穀雨前一日盆中金鳳特發一花甚肥偉首翅

尾畢具宛如鳳形預占佳兆二首

盆中三鳳擬河東忽見光瑩著入一叢疑是飛花來點

綴細看有蒂果然雄

五年願望豈成空

乙卯有詩為書謨預擬生兒迄今未遂

今夏期將立愛通却

感花神先報瑞朝陽鼓翼氣蔥蔥

齋居春久感事遣懷

仍香山舊題倒次其韻

七十四年春

白春分又四句蔗漿除內熱芝餅饜羸身

理穢幾忘午澆花已盡晨惟憐孫搢祖不用主迎賓

恰值義壽

三週共賞牡丹

矯首天地曠會心魚鳥親露濃香帶濕月淡靜無

塵啓戶思玄鶴呼童憶舊人齒衰留骨傲自笑與誰鄰

麗照卜居西關之右手書積慶堂一區與之且

冀其去武歸文教子以慰老懷

充閭應析箸吾髦未能拋一子殊堪教數椽儘可巢

帝心方便武家慶在謙爻

唐憲宗命侍御唐武更名慶今義壽更名義爻字以謙吉而堂名積慶適有合焉

同氣還相顧逢人莫濫交

六月廿八日書謨得子誌喜

并書後

金鳳今朝真至矣金山昨夢却奇哉雙雙佛子嬉嬉笑
不知端的阿誰來

先是丙辰秋予攜書謨登金山得見坡公了元銅像有詩紀之今歲春暮盆中金鳳花發又有詩為書謨期之夏四月十八五更時得一夢恍身在半山有广内供數龕不識所謂乃下佇平坦處儼如妙高臺忽有兩沙彌嬉笑而來年可十六七許頭披小桃搭髮予問之曰上方龕供何人答曰此吾輩祖堂也予聞鵲噪遂醒茲書謨抱禮莊第三子為子取乳名坡元製銀牌鐫坡鍾夙慧元證前因八字以挂其項因口占前句并書此以紀云

七月二十八日坡元彌月忽憶辛巳歲吾友陳

君道柔招予同祀蘇公於洗硯池邊賦詩紀事

即是日也

見飴庭集

因詢家人知坡元產時母竟不作

分挽狀殊屬靈異予不德何敢妄擬先生之降

庭然予之景仰先生者既深且久矣其能已於

烹泉奠酒而無一言以紀之乎得截句二首

四十年來盛事虛坡公挈伴到吾廬

以佛印元配

二可泉

在東田別墅

充第二品

謂惠泉

久藏斗酒待鱸魚

邀靈如達已怡情災難全無易長成此日剃頭重致祝

儘教衆口說聰明

翻用坡公洗兒詩意

附步韻敬謝

書謨

祖功宗德敢云虛喜抱嬰兒守故廬額表高風尋樂

處

謨書華隱高風一額奉置別墅

碧天池上看儵魚

舉家歡笑洽人情添著紅衫祝有成自愧樗材期跨

竈圭璋特達向高明

遂初堂闢蘭盛開

勇退攜蘭舊草堂於今復見鬱秋光想因當日藩閩德

留與曾玄壓衆香

十月十六日麗照次子眉壽生擬彌月如坡元

例重祀蘇公於草堂以佛印配為應兩沙彌之

夢也仍依昔年祀蘇用眉山為韻作七律二首

疊見兒孫各產兒數珠百八却稱奇

距坡元生恰一百零八日

姪先叔後

翻前事

丙辰義壽先沾恩後今則坡元先眉壽後

道去僧來合故知

前番祀公用道士奏仙樂茲以公曾寓太平寺

題法華院額故用院中僧奏梵音以樂公

菊已堪餐宜進酒梅將索笑且開眉幽栖

長借名賢重何用皇皇有所之

正值于茅于耜間邑居深處好偷閒久同李愿歸盤谷

欲傲希夷入華山堂下香椽登翠盞徑中柏頂綴紅鬟

雪裏紅子
蔓纏柏頂

千秋詩派心相契遙望靈旗去復還

哀顥兒三首

十月二十三日天大雨雪正值顥兒四七之辰偶
開窗見雪壓白華觸景傷情不覺有慟越日書此

命孫詩南粘於喪
次靈其有知否

誰云忠厚得延長痛汝平生苦備嘗諱疾恐傷二老意

可憐病已入膏肓

癖性長齋併
素不服藥

雖幾中壽非為歿十載鰥夫鬢半霜

戊申冬
其妻亡

更有目前堪

愴事兒婚猶未產孫行

純陰百斗都銷歇忽見南枝鬪雪光不伴丹花伴白首

繡毬花向與牡丹
同開今忽放一枝

折向靈前一斷腸

庚申元旦扶杖徐行率子孫曾拜四代遺像

我生十五值庚申今老重逢領後昆通族齒尊雖第一

愧對先人說達尊

寄懷呂四梧坪

時為泰
州廣文

吳陵隔江望一葦未能杭官舍寒氈久

十載
未遷

文章光燄長

分茶新見惠

乙卯長君歸
餉予新茗

倚玉舊難忘

曾以幼女字予子
時保因女孀不果

猶作同遊

想遲迴結寸腸

預擬時保生兒取名麟玉以六經全孫行也

天上石麟誰抱送名呼麟玉動人聽吐書繫紱應非謬

摩頂徵雲亦有靈惟願百憂銷我後敢扳五老降吾庭
他時若說麟經義臣子同聞似振鈴

題按摩圖小照

時年七十有五

嘗聞人身五臟皆繫背岐黃針刺工夫邃按摩妙術起
何時揣知穴道尤難昧吾年開八病纏綿足軟龍鍾多
老態漫學東坡慣黑甜飴後耽眠恐傷胃指示家僮技
可能手熟拳鬆乃稱最日中至昃及黃昏三度呼來休
解怠從茲不藥亦長生何用丹砂燒鼎內斷酒除煙勿
復萌寡慾清心當自愛

小香山四景

紫竹臨風

南海分來竹數竿颼颼細響似吹彈却堪接引危橋畔
一渡能通自在禪

白蓮承露

汙泥不染曉來鮮此種天生伴佛仙我亦人呼隱君子
其中一滴味真傳

朱藤挂月

枯枝作架石顛懸幾穗連葩傍晚看疑是羽衣來月下

一宵春夢醒邯鄲

翠蕉凌雲

朱欄亭子碧雲漫長葉陰陰透井榦寄語塵寰熱中客
清涼一榻此間寬

六月十九日時保以兄子眉壽為子特於大士

前摩頂更名誌喜

名更麟玉字孔初別字元再是日
書謨子坡元同拜更名學勝字九餘

降本金山愛等金更名加字頗勞心新栽綠竹逢時雨
相期與竹共森森

中秋夕月正望桂正開與子四人孫九人曾孫

三人集遂初堂小酌感花月之當時兼天親之
聚首良難也因賦是章

天時人事本無常幸得良宵聚舊堂對月一樽花影動
連身四代笑聲揚煮菱剝芡隨時備裹露餐香引興長
閉戶團團消世慮未知來歲又何方

秋萱花

萱花五月已開繁此種偏邀白帝恩記得攜歸從白下

丙辰秋子孫四人
人省試得來

忘憂宜子萃吾門

辛酉春義文麟玉
學勝出痘俱告吉

木芙蓉

拒霜翻作最宜霜坡老當年寓意長花國焉能闕一種
補栽石罅賞孤芳

辛酉六月二十九日丑時詩南生子三日浴後
取乳名芝元喜成一律

夜半樓頭行忽鬧起來傾耳有呱聲知為如達人咸喜

却應當年芝一莖

澹香池上產芝
子有詩見前

忠厚吾兒

謂

方食報倡隨

三載幸生嬰同堂

謂坡元

小字相仍取世世同居以硯耕

花國中千葉榴花比年未放今秋七月特發數
枝光艷可愛適時保禮莊起行省試賦此示之

五月名花種誰知七月開人言多子兆我作送行媒爍
爛真如錦文章孰是魁乘風破浪去看桂早回來

詠身

香山舊題

碌碌浮生八十年半從遊學半林泉已叅老子谷神說
還誦賢侯抑戒篇若或靡盈能益算敢云既耄未知天
三多自古滋憂懼何必懸懸望五傳

予精力日就衰耗欲從此閣筆而家人猶以如文
衡山耄耄見玄孫為我祝故書此以示意焉

已上計二十九首

起已未
花朝

壬戌二月十九日第五曾孫生禮莊三日親往源
遠堂看浴取乳名自在誌喜

久辭筆硯養吾神又喜生曾遇仲春儒可通禪觀自在

兄先繼伯啓靈辰

其兄坡元己未六月生
嗣書謨時亦持觀音齋

居分城曲肩輿便花

秉蘭枝手授親若見他年添一代不知更浴幾多人

三月朔遇清明節有感

御苑纔開遊賞榜藩間又見乞憐人關情巧句無人詠

鶯燕溪山空暮春

合弔城中兩墓

一為宋義僧莫謙之在護國寺後
一為明學博王伯璵在舜宜橋西

生時居城市死則葬山林郊外塚纍纍等閒何足欽稀
聞城有墓遂起弔古心老興力疾走扶杖東西臨護國
元始建義僧寔其陰坡公北宋人題額疑難叅或他所
移置名筆傳至今忠蓋宋驍將雙刀殉國沉家世籍臨
川後賢遠來尋終此學博任未得西歸封叶字音切兩葬子城
內相望遙山岑向傳此城拓襄武功實深明紀垂三百
滄桑變亦三城分内外界遺老盡無諳春草長芊芊秋
風聽蛩唵碑塔俱已沒保無強暴侵熙來復攘往皆是
逐利衆叶才遙切誰為奠一盂灑淚紛沾襟

夏氏伯姊去冬八十因寒泣未過江上一祝心
甚歉然有約今春來聚吾姪處姪即其婿茲見穀雨花

開懸望不至賦此寄甥經西補壽兼以寫懷

吾姊年登九九齡從前歡會頗繩繩壯懷已付江流去
老景還期霽日升且倩花王延富貴莫追夫婿悵騫崩
慙予病煩雖偕老爭及身安有子能

送春

春從何處來送去歸何處花落故遲遲意欲留春住

題起莘

衡

姪丹崖偃息圖

用索陽夫子
題祝生畫韻

老耄閉戶已成癖過我門牆徒四壁我亦無憾任縱橫
偶有散吟不自惜那知小阮獲我心彷彿丹崖希偃息
長卷叩我屬筆題一望前茅猥難敵摹神寫照倩了翁
補圖更喜阿咸工謂振昆姪山樵子久撮勝槩丹青潑墨看迴
風遙思別墅定安東子山莊在焉他日耦耕樂何窮呼童沽酒
不忍釋徘徊携手夕陽中安陽芳茂都列面倏忽狂飈
起激電子衰我老總不恨但願往復足力健髯枯鬢焦
誰還變筆底煙雲常峭蒨為子當續機絲練只恐外人
不欲見

哀燦兒三首

壬戌九月十六夜瞑坐而逝

阿兄學佛爾叅玄三載同歸九月天

顥以己未九月廿五終燦終於是歲同月而日相近亦奇數也

豈是儒宗超二氏竹牀端坐儼伊川

伊川先生是日與尹和靖舉手遂坐而卒

餐松服石本前緣劉助當年遇二仙

見彬陽仙傳

怪汝少時曾

辟穀於今漫道得真傳

不食已踰旬矣

花國南枝又放英

繡毬花放如前

斷腸楚調那堪賡老年不幸誰

如我連慟西河將喪明

壬戌臘月十三日長孫書謨三十家人為祀壽

星乞予詩以祝之予時方痛其父何心吟詠乃

夜分輾轉不寐忽憶癸卯生朝自壽有效紫陽

體次韻詩屈指已二十年背誦不能全矣惡欲

檢閱撥爐火猶未燼也披衣挑燈書此待旦以

示且自遣云

陽生半月猶寒涼

前月廿六日冬至

吾孫足病難登堂家人就榻俾

爾康求醫每恨無良方便宜自愛只深藏學古有獲原

未荒衾裯需溫應避煬為祀南極供霞觴賚汝一滴真

瓊漿神謂汝病淡且忘皮裏膜外幸無傷悲歡迭見曾

何常幾人百歲能無疆戒汝躁性柔克剛參苓不惜賴

汝孃惟有積善天降祥憐予老髦傳家硯開春東墅同
徜徉

歲杪雜感用先大父題雪山圖句起足成一律

漠漠寒雲度嶺忙裏頭矯掌望斜陽土人把築新園墻
謂燦兒官稅頻催急歛揚紅子啄殘無賸粒玉梅藥逗尚
厝處

微芒獨憐翠竹森森長遙映蒼松擺粉牆

時保好養蘭閩杭興羅列賦此以賞

癸亥四月
次紫陽韻

呼兒閱蘭譜那知蘭已滋出入手自運寤寐心常思雖
愛清和日休教湛露晞坐久香偏遠助我得新詩

杜門

仍紫陽題并韻
四月望日作

攜幼止衡門茹素甘淡漠道侶與緇流笑彼俱妄作喧
風吹牡丹驟雨打新籜惟有杜鵑花耐久未零落客來
叩長鬚雲遊儘可託

夜

以下二首並
用紫陽題韻

危坐窺牕落月清陽烏初起未分明呼童睡熟雞聲寂
嘖嘖檐頭似燕鳴

趁韻

妙手圖成蒼鬱林

瞿寧賢寫九
如圖見贈

高文作配想知音

擬呂梧
坪作序

紛紛

門外人如許可解平生一片心

哭書謨二首

癸亥五月廿五日
終越七日後作

人生修短有何憑天道無知實杳冥百藥難醫真錮疾
一家積善也無靈拙齋初筆方求益

書謨近刻
諸公賜序

顏子餘年

欠一齡不才不死才偏死我死誰爲草墓銘

酷暑方驕瘦骨屯老年歷境更酸辛喪子有慟風中燭

痛汝還尋夢裏春宿草未除猶灑淚

其父歿
未及週

紫薇正放又

傷神痴心祇望傳家硯此後應爲絕筆人

余與研堂交非泛常比也研堂與余生同年月自幼

相識庚午辛未間研堂年尚少即以能詩著稱鉅公

名宿交相推許故余樂與爲友幸亦得邀不棄乙酉

同被放又同屆四十懸弧之辰彼此以詩酬答遂於

是年臘月共訂諸同志結醉吟詩會自是往還益密

無越至三日不晤者每晤則坐必移時燭必屢跋僮

僕在側往往觸屏欲睡而余兩人娓娓不倦率以爲

常狀談詩論文外槩不他及故研堂歷年所作無不

出以見示今所刻正集十卷皆向所捧讀者也戊子

是題
歲余以饑驅浪遊於黔於蜀已為窳乂而三至西江
前後計一十餘載今春歸里自分衰頹閉門謝客一
過研堂見先生亦鬚髯盡白蓋屈指相別已二十七
年矣坐甫定承以所刊詩集示余觀其續稿晚稿及
蒼外散吟諸帙皆別後所作而余未之見者攜歸細
讀歎其識益高筆益老氣格益古如長松勁柏挺生
於高巔絕巘之上而聲色之動人則又如風濤之可
聽蒼翠之欲滴再三吟咏擊節不已乃知研堂老而
好學以至於此如夔州以後之杜詩儋州以後之蘇

詩皆以晚而愈工其所刻有必傳無疑者雖其意中
亦以不得遇於時偶形諸楮墨然視掇取青紫而一
無表見者相去何啻什伯邪猶憶余將出門時研堂
語云以子之才恐不免作幕客彼時余尚微有不平
之意畎意頻年潦倒奔走四方果不得已借以糊口
金線年七為他作嫁自致無成回憶良友之言未嘗
不通身汗下也茲喜研堂詩集之成知其可傳畧叙
數語書後并牽連及之以誌余愧云雍正甲寅重九
後十日同學弟龔時愷拜跋

原名
玠



是

卷之

第

一

章

賦

一

章

賦

圖

